

Qilalukkat nipinut illersorneqarnissaat siunertaralugu kangerlunni qaqortat qernertallu sivisunerusumik najortagaanni angallatit aalajangersimasut ingerlaartarnerisa killilerneqarsinnaaneranut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA2023-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartunut ilaasortaq Jens NapätôK', Partii Naleraq)

Akissuteqaat

(Nunalerinermut, Imminut Pilersornermut, Nukissiutinut Avatangiisinullu Naalackersuisoq)

Siullermeerneqarnera

Naalackersuisut sinnerlugit Inatsisartunut ilaasortaq Jens NapätôK', Partii Naleraq, siunnersuummut saqqummiunneqartumut qutsavigaara.

Naalackersuisut 2021-mi Kalaallit Nunaanni Uumassusillit assigiinngisitaarnerannut periusissiaq 2030 akueraat. Soorlu Uumassusillit assigiinngisitaarnerannut periusissiami allassimasoq, Naalackersuisut uumassusillit assigiinngisitaarnerat, naasut uumasullu, inatsisini attuumassutilinni aammalu piujuartitsiviusumik aqutsinikkut illersorniarpaat. Nunarput kinguaassatsinnit atugariinnarparput. Nunarput aammalu uumassusillit assigiinngisitaartut maaniittut paarilluassavagut.

Qulakkiissavarput arferit – aammalu uumasut allat – najugarisaminni imaluunniit piaraqartillugit piffissani ajornartorsiorfiusinnaasuni, pisariaqanngitsumik akornusersorneqannginnissaat. Piniartut Ittoqqortoormiineersut, Tasiilameersut Qaanaameersullu oqaluttuarput, pingaartumik umiarsuarnit takornariartaatinit aammalu tissiartaatinit mikisunit akornusersuinerit nalaattarlugit. Piniartut oqarnerat malillugu umiarsuit kangerlunni ilorpartertarput ilaannikkullu imaani uumasut miluumasut imaluunniit piniartut piniariartut qanillisarpaat. Tamanna uumasunut aammalu piniartutut kultureqarnitsinnut akornusersuineruvoq. Peqatigisaanillu arferit akornusersuineranut nipiliornernullu malussarissorujussuusut, biologit misissuinerisa takutippaat.

Takornariartitsinermik inuussutissarsiorneq ineriartortissavarput, kisianni ineriartortitsineq piniartutut aallaaniartartutullu kultureqarnerput pilliutigalugit pissanngilaq.

Takornariartitsisarnermik ineriartortitsineq piujuartitsiviussaaq.

Taamaalillutik Naalackersuisut arferit illersorneqarnissaat pingaaruteqartoq, isumaqatigilluinnarpaat. Kangerlunni arferit aasaanerani sivisunerusumik najortagaanni assersuutigalugu umiarsuit takornariartaatit angalasarnerinik maleruagassiiviusumik inatsisiliorluta taamaaliorsinnaavugut. Allaffissornikkut isumalluutigut killeqarput, taamaattumik isumalluutit pigisatta aalajangersimasunik iliuuseqarnernut atornissaat kissaatigaarput – annertunerusumik misissuinissanut taarsiullugu nutaanik inatsisiliornermut. Kisianni maleruagassineq soorunami atuisut biologillu qanimut suleqatigalugit ineriartortinneqassaaq.

Tamanna tunngavigalugu Naalackersuisut allannguutissatut siunnersuut manna saqqummiuppaat:

”Nalunaarummik, nipiliornernut arferit illersorneqarnissaat siunertaralugu, kangerlunni arferit aasaanerani sivilunerusumik najortagaanni angallatinik aalajangersimasumik suussusilinnik imaatigut angalanermut maleruagassiiviusumik suliaqarnissamik Naalackersuisut peqquneqassasut.”